

惟清齋全集

梅庵詩鈔

七古

朱碧山銀槎圖歌

洪鑪火花飛列缺鑄作銀槎探月窟欲挽銀河入酒杯
咫尺波濤變出沒槎腹大書至正年一代酒星飛上天
碧山老去但槎在槎復不見圖空懸國初前輩重詞翰
題識紛紛競甲觀舉瓢大笑挹天漿不覺名章動雲漢
耆英散後繼者誰覃溪詹事風雅師邂逅此槎爲寫照
重此猶是先民遺披圖懷古付殘酌槎兮槎兮竟何託

長白鐵保梅庵詩鈔

醉鄉人泛析津迴不聽筵前白翎雀

草書歌

蒼頡不識篆蟲鳥開天荒史籀不識楷古法遺鍾王聖
人作書祖造物天地不得留微茫草書有名理盛自漢
與唐杜度瑒崔瑗狂素階顛張心法授受縱奇變牢籠
百態驚愚盲譬如彼蒼鑄萬類物具一體無相妨飛潛
動植各有勢短長肥瘦誰能量又如將軍坐帷幄運籌
百萬網在綱韓信兵多多益善指揮方位爭趨踰方其
執筆時意靜神飛揚洪爐火激迸列缺晶盤冰滑流珠
芒蒼鷹盤雲縮爪甲奇石攬壁春雷硯陰陽姤接作向

背子母孕化交縱橫枯槎百圍臥瀚海女蘿千丈縈扶
桑忽然墨冷筆華溢陡接渤海波瀾狂書成不快意大
呌週迴廊舉頭天尺五雲物相低昂欲礪太山爲研石
欲抉東海爲墨莊凌鑠大塊寫生態睥睨雲漢摹天章
二十八宿走且僵帝女大笑揮霞觴丈夫師古但師意
安能描頭畫腳忍與朽骨爭媿媿我歌草書歌未央飄
風驟雨來虛堂依稀不曉神靈意莫向蛟龍攫處藏

霹靂

空山霹靂拔地起絕壑雲埋嘯山鬼雷鞭一掉萬戶驚
隔牕瞥見赤龍尾

樊將軍

燕丹不能生秦皇不能死高義逼長虹一死如脫屣將
軍斷頭納缶裏白衣者誰渡易水

種竹歌爲慶似村賦

北人食喜肉北地不宜竹累累塵垢堆滿腹未必不肉
卽不俗似村瀟灑興不凡日日大嚼心貪饒有時愛竹
如愛肉臭味與俗殊酸鹹自言種竹無別理歲歲培糞
根荖底幾見臭腐爲神奇竹未免俗亦如此幾竿矗立
高插雲幾竿天矯簷際分更有小叢初毓土倚側如列
兒孫羣我來看竹北牕下綠野雲濃向空瀉主人愛我

如此君不知我亦肉食者吁嗟乎世人愛肉但飽身愛
竹誰解傳竹神願君更種萬竿竹遍贈人間肉食人

前畫虎行

何人怕虎更愛虎摹擬虎勢作虎譜獰猙據險如寫生
白日虛堂喚腥雨耿耿裂眚疑闕人鬼母却走愁虎噴
齒牙嚼嚙拳爪申俚血猶吮猩猩唇長林豐草馳奔馬
千里雄風振大野如何齷齪尺壁間蝟縮斑毛威莫假
兒童戲搏如等閒狐兔跳躍難追攀幾見南山豹隱霧
日日變化超烟寰君不見古人畫龍飛天上今人畫虎
失虎狀安能破壁排長風八極雲山任奔放虎兮虎兮

自有真萬古丹青氣凋喪

後畫虎行

世間真虎不可見畫此凡虎無神奇荒村黑夜盜雞犬
豐林白日戕獐麋一朝饕餮墮伏弩僵臥笑殺羽林兒
南山有虎養虎德隱如元豹韜光儀咆哮廣漠山谷震
蹕躍大野風雲隨會逢哲匠摹虎癡以神遇虎形則離
褒鄂颯爽賁育鬪倭魂啼血愁奔馳挂向深山百獸伏
豺狼狐兔兇熊羆世人畫虎不知虎但以皮相求雄姿
苟以皮相求雄姿真虎真虎人應疑

讀呂叔訥廣文讀史三百四十詠喜題長句

呂君好古不泥古紀事編年秘全譜眼光直落羲皇前
二十二史盡塵土無懷有巢墳典闕舊說荒唐恨莫補
一從揖讓開征誅大塊茫茫亂如雨史稱傳信多傳疑
吹霜歎露忘妍媸興朝人紀勝國事是非往往遭轉移
子長尙爲穎士謫班固難免夾漈譏降此良史不多見
紛紛載紀尤支離卓哉紫陽起老宿直接春秋作綱目
一字能還正統尊千秋頓使奸謀肅白日雲霧當天開
黑夜鬼神背人哭遂令好古不平士洗盡閒愁千萬斛
呂君呂君曠世才得此下酒何雄哉元精中貫心眼開
等閒論古凌鄒枚二百四十章爲推筆椽目炬聲如雷

奇情每自天上來議論無本詩無胎笑余讀史不見史
一事無能述原委幾因立說羞雷同不使胷中留片紙
讀君鉅製輾然喜陡覺高懷爲君起耳食何須傍古人
大開眼界從今始

題石田翁遺照

先生心隱跡未隱面目依然落粉本不衫不履一老翁
次采風流竟難泯十五作賦驚騷壇當時人擬王子安
賢良有詔詔不起遜之九五愁彈冠歸來高臥竹莊下
彝鼎圖書實瀟灑尙書爭問沈先生邑宰誰知畫壁者
兒爲母命人盡知等閒未敢輕別離斑衣色映華髮垂

九十九母八十兒終年奉母勤頤養餘事丹青寄元賞
遂令萬類遭刳鑿元氣淋漓徧天壤詩宗白傳祖少陵
劒南衣鉢相師承遲暮盡焚少年作詩律愈細才不矜
一生作書喜山谷瘦勁通神竟無肉頰毫冷墨任欹斜
森若霜天矗寒木先生往矣跡已陳一蕉一竹爲寫真
清齋酌酒肅再拜飄飄仙骨超凡塵對此古心復古貌
頓覺孤懷起相照欲寫清詞問古人高風未許人同調

銀瓶孃子詞

宋岳武穆王女

陰房夜黑烏啼霜金井瑟颯梧風涼將星指顧揮欃槍
萬丈光墮天蒼蒼攜瓶照井井水碧不濯清泉恨不自

天王明聖臣當誅賤妾一死不足惜海風吹得井水乾
白日當天照寒魄

題倪文貞公疎林遠岫圖

品畫如品人人貴畫品尊吉光片羽久不滅鬼神愛此
精氣存倪公著六法遺烈垂乾綱偶然胸臆託毫素意
象瀟灑超籬藩遠山掛一角嵐氣低黃昏老樹抱勁節
鐵立何軒軒白屋當其中秋風吹閉門嗚呼先生乃生
明祚末昂首咫尺天爲翻有寃不能填碧海有手不能
扶崑崙遂令抑塞磊落不平之奇氣寫此尺幅萬里愁
雲屯君不見依雲閣成荒園門外青山自春色庭前芳

樹遺枯根何如此畫真不朽摩挲不露兵燹痕乃知神物壽千古畫師畫師何足論

古赤銅刀歌

天地起肅殺蚩尤作五兵赤刀重天府鑄出昆吾精古來神物有顯晦茲刀何以鳴不平森森入手不盈尺古製斑剝難知名建平永安年號闕玉環金削無真評鵝鵝膏冷土花澁鰓鱗形蝕寒茫清赫連龍雀耀冰雪苻堅神術埋榛荆何人新豐醉貰酒何人燕市歌送行遂令三寸露光怪神彩奕奕聲鏗鏘我把此刀重歎息古光照人雙眼瞪背嵌翡翠色閃灼柄刻蝌蚪紋縱橫胡

爲塵埋數千載吹毛削玉功無成今茲出土尙完好發
硯一鼓揮長鯨吾聞寶刀貴大用一彎之割非所爭善
刀而藏計亦得鋒鏑內歛韜光明慎勿小試鏌鋣鈍翻
使牛刀笑武城

後赤銅刀歌疊前韻

君不見干將鏌鋣世必用祖龍作計徒銷兵首山赤銅
躍大冶牝牡變化韜元精當時鑄此豈無意擎出欲刻
君山平遂令造物忌刻削埋垢千載無知名風雨剝蝕
鏌鏑鈍鉛刀一任人譏評質擬赤金重色如秋水清不
入呂虔佩遑問聶與荆蛟龍藏魑魅走深山大澤堪

橫行胡爲匿影書案側寂然鉅響收鏗鏘陰房夜吹鬼
燐碧毛髮淒緊睛雙瞪龍賓不出脉望死畏此雪鏐寒
光橫摩空巨刃乏神力懷鉛握槧終何成有客南山殪
猛虎有客東海殲長鯨書生喜說萬人敵乃於文陣矜
鬥爭用違其才器不利湛盧精銳羞蔽明何如寶劍遇
雷煥化作斗氣騰豐城

雪中小集用東坡興龍節微雪韻

嚴風吹落恒河沙閉關枯坐休晚衙誰將處士簷下雪
散作天女空中花濁醪勸影酒有國白戰效古詩成家
座上丁冬戛簷竹天外嘹唳啼寒鴉小山凍梅欲破蕊

土盎殘菊猶含葩移榻每容客高臥掃徑不厭童推爬
名香共熟博山鼎玉椀快鬪龍團茶高歌偶效祖逖舞
豪氣直擬禰衡搥人生嘉會等閒過雪泥鴻爪空長嗟
好拚三百六十醉日對快友酣流霞

約齋十硯歌用東坡龍尾硯韻

書生心力不知惜日日齋頭磨紫壁卅年未見一硯穿
百歲那能洞十石約齋嗜古經歲時物聚所好誰能辭
端溪龍尾世罕用黃琮白琥人難知千年寶光脫塵垢
蕉葉龍文是硯有編譜都居漢瓦前衡材不落唐坑後
揮毫亂蘸剡溪雲美人膚膩無纖塵一生拚作石知己

此後應無硯主人莫持成數忘精擇真賞何能中道畫
珊瑚一網難盡收玉色金聲望甄別

燈節前四日微雪趙蘭生孝廉過齋中用東坡興

龍節詩韻

壯懷千里騰龍沙

去歲余保荐副都統同舉者八人赴
新疆辦事余以轉閣學獨留京

詔恩綸閣休早衙佳節遠攜雪中友故園高詠燈前花
蘭生南國古畸士七言五字詩成家鴻章鉅筆振都下
初機末學空塗鴉忽然排闥報佳客入門談笑芬奇葩
拂座無事客揖讓掃徑爲遣童推爬八叉爭試飛卿手
七椀快進盧同茶起視天外玉龍舞繽紛如驚羯鼓撾

人生快意事不偶雙丸虛擲真堪嗟與君暫息四方志
天漿飽飫酣流霞

西山寺宇多前明閩人所建瓊宮紺室參差岩壑
碑刻姓氏間有存者感賦長篇用識軼事

朱明闢黨煽妖蠱處處琳宮起紺宇八埏四極烈焰周
不剩西山一片土千楹萬楹草莽中碧瓦朱甍照環堵
家家私廟競壯麗百萬帑金出天府豐碑矗矗高插天
司禮監名越公輔遂令遺孽徧生祠委鬼淫威滅鄒魯
衣冠袞袞稱假兒甘附刑餘聯世譜思宗尙非亡國君
初政乾綱振九五不圖末季天步移亦冊監軍到逆豎

周將軍死三鎮降倉卒獻關付闖虜吾輩富貴自有在
參養百年竟何補解嘲唯有王承恩君殉社稷奴殉主
古來治國存大綱嗜好偶偏累神武緇流不救武帝餓
伶官莫禦莊宗侮駕馭羣小豈等閒耳目之近列豺虎
大哉

聖朝開國初煌煌

天語示萬古鐵碑矗立殷鑒懸闡寺之名臺隸伍我來
廢寺重盤桓懷古無端樂且舞山川滌盡前朝塵靄靄
千巖萬巖雨

題黃左君藏倪高士詩草墨蹟

昔讀雲林畫落落天機露光怪獐羊掛角橫遠山從此
倪黃各分派今觀雲林書顏毫冷墨任卷舒后主瘦金
秘遺法翺翥千仞秋鷹如先生書畫世爭寶況是當年
舊存稿或塗或抹三易成陡覺人書共詩老清秘閣中
春晝長伐毛洗髓酬飛光一生好潔得潔癖塵俗滌盡
存古香嗚呼先生乃生至正末散盡千金世網脫黃冠
野服歸去來到處扁舟天地闊出沒震澤三泖間百萬
貔虎如等閒假王有召召不得釣竿直拂珊瑚還至今
遺墨詩千首片羽吉光神鬼守人間五字如晨星天外
羣雄等芻狗黃君好古精鑑懸高士手澤資流傳名香

奇茗靜開帙莫放塵飛簞笠邊

臘月十九日集蘇齋作坡公生日觀宋漫堂小像
及西陂草堂圖用西陂集中祭坡公詩韻

天地不合老大蘇詩壇誰復起懦夫狂瀾欲倒不可挽
望古拈斷千髭鬚漫堂先輩有蘇癖大沛遺澤沾濡
繡出平原鑄賈島丹誠應鑒心區區爲圖繪公侍公側
面龐彷彿形氣俱辨香隔世縑衣鉢金針黠度聊自娛
至今蘇老宋亦老覃溪空寶西陂圖每逢歲臘十九日
衣冠再拜陳尊孟朋從絡繹儼賀客到門車馬填街衢
嗚呼蘇公已沒未嘗沒圖存想像神有無漫堂祭蘇託

繪素當時羣論驚爲迂覃谿更作蘇生日嗜好無乃酸
鹹殊我繪覃谿繼公後旗鼓角勝分一隅他年更逢好
事者睥睨百氏如庸奴

題春山孝廉小西湖春泛圖小照

我昔貌我乘槎濯足滄海東一葉天地隨長風齊烟九
點瞥眼去如矢縹緲掀簸洪濤中章亥不能步嗟嗟
途窮析津竟何處飛棹超華嵩丈夫奇想落天外造物
不得相牢籠茲繪西湖試春泛意向與我同年同永安
競渡軼事古激浦浩淼留孤篷至今雲峯九十九蜿蜒
不變撐高宮楊老鐵顧阿瑛勝蹟千載歸鉅公風流文

采互掩映湖光山色增昭融春山欲步二公後結想久
矣凌長空嗚呼百川學海不到海文瀾壯濶超鴻濛滔
滔渤澥絕涯涘西江一吸如長虹片帆鼓櫂問津去河
源欲探誰能通春山春山副壯志乘風破浪心膽雄此
湖不小鏡湖小金牛恍惚驚愚矇我將攜圖與君買棹
去睥睨萬類指顧嘯傲馮夷宮

灤陽客中長歌寄懷姜度香司寇

春官三月桃李紅莘莘文戰分雌雄揭來灤平風景異
不爭筆札爭刀弓短衣裁後便騰蹕步伍追躡千羆熊
興酣走馬下平坂茫茫大野低蒼穹山光雲影變朝夕

六月往往涼颺通羅漢峯頭月皎皎僧官帽上雲濛濛
牕間列岫日排闥不知身臥烟霞中達齋司寇有畫癖
對山寫山神氣融贈我尺幅挂齋壁欲補造化天無功
時帆學士老嗟客千巖萬壑歸詩筒紙牕高臥寫生意
山靈處處遭牢籠我來不愁旅況寂結廬更近南山東
登高舒嘯脫塵袂意氣欲化垂天虹丈夫處世恥齷齪
安能白屋嗟雕蟲闔中校士頭欲白塞上得馬還成翁
人生能間客亦好雙丸跳躍隨飛蓬長歌寄公等兒戲
達者所見將毋同

自題相馬圖小照

相馬不相皮與毛相此駿骨超蓬蒿雲螭月駟世罕覩
欲寫神物愁添毫塞北行圍富叱撥飛兔驟褭聲喧囂
四十八家競從獵沸騰萬騎如奔濤我來扈從媿文弱
不事筆札環弓刀平生每懼銜檠變至此膽氣增粗豪
據鞍顧盼志亦得超越絕壁隨猿猱乃知駒駉別有種
不與駑駘爭櫪槽千里馬生伯樂出生者相者欣相遭
繆君妙畫虎頭比品題處處傳時髦寫我箕踞對神駿
一時冰鑑誰能操我願相馬人都如九方臯驪黃牝牡
難遁逃天閑出入列上駟馳騁萬里風雲高相馬得馬
如得士敢教白眼驚吾曹嗚呼不教白眼驚吾曹馬兮

馬兮甘任勞

錢武肅王鐵券歌

龍池生龍龍飛天甲馬聲振紅光懸婆留并乾未屈雙
金戈雙舉文如錢真英雄起奪草昧羅平鳥語江濤邊
疊雪樓頭架强弩潮落貫組長堤堅居民千載拜公賜
區區鐵券名徒鐫含元殿上妖星落少陽院中神器遷
唐祚未卜天復末錢氏誰記乾寧年何如龍山表忠觀
奕葉賽祭猶綿綿名馬玉帶嗜好古虎符龍節隨風烟
眉山爲文祖西漢豐功鉅製爭新鮮立功立言兩不朽
此券任落漁家船酒酣讀史唾壺碎金置石室文誰傳

冬日邀百菊溪法時帆文芝厓諸君子石經堂小
集

嚴風吹霜冰掛簾白日鍵戶思幽潛佳客接踵探邃室
臭味與我同酸甜濁醪數斗客大醉盤殮不腆無傷廉
二紅飯熟等兒戲冬菰啓甕嘗新醅近牕寒氣更凜冽
熏爐獸炭催人添羅坐向火試白戰毛骨淒緊神則恬
臘月寒威徧天地暖氣未必先窮簷此時饘粥不果腹
我輩餘瀝難同霑況復人生異金石故舊瞥眼身凋殲
時泉已陳盆亭古交情當日如膠粘對此茫茫百端集
忍令短晷沈西崦我歌未終客起舞座有險韻看同拈

狂呼落拓越禮數嬉笑怒罵皆針砭酒酣炙硯記佳日
阿凍揮盡吳州縑

米老硯山圖歌爲羅兩峯賦

一拳寶石耀光采歷宋元明色不改南唐舊物米老存
中有元精動真宰海岳庵中秀氣古淚滴蟾蜍尙礪礪
六峯起伏天削成幾共桑田變滄海人生好奇亦有數
尤物流傳恃精採摩挲不露兵瘃痕黝暗微遭劫灰浼
覃溪博古判兩石竹垞漁洋悞應悔兩峯妙筆繼仲圭
如寫胸中舊硯礪吁嗟乎甘露寺下江不流北固峯頭
客誰在巍然此石棱角全不共銅駝葬幽塋安得三十

六峯同入蘇齋圖合璧聯珠壽千載

雨中登臨江樓作歌

梯山航海盡屬國天地何須限南北吳頭楚尾大江通
白日龍鼉遊人匿臨江樓頭雨正酣渺渺澄波淨如拭
布帆無恙懸秋風欸乃聲中羣動息棲霞山在江以南
飄渺崗巒天影側蜿蜒曲抱郡城高襟帶遙鋪蒼翠色
生平未作湖海遊至此波濤苦難測去年有弟赴關東
望海樓頭煊奇特我今欲吸西江回萬里鯨波盪胸臆
乘風不負越南行他年更作滄洲憶

南唐官硯歌

歐陽文忠公銘云此硯用之二十年矣當南唐有國時於歙州造硯務選

工之善者命以九品之服月有俸廩之給號硯
務官歲爲官造硯有數其硯四方而平淺者官
硯也其石尤精製作亦不類今工之侈竄此硯
得自今王舍人原叔原叔家不知爲佳硯也兒
子輩棄置之予初得之亦不知爲南唐物也有
江南人年老者見之悽然曰此故國之物也因
具道其所以然遂始寶惜之其貶夷陵也折其
一角皇祐三年辛卯龍圖閣直學士歐陽修記

金陵玉海韜瓊緘土花剝蝕愁鐫鑑南唐舊物製醇古
重以六一銘初劖歙州龍尾世罕覩硯官九品書頭銜
原叔家藏故老見吞聲故國詞喃喃歐陽手撰五代史
考據軼事真精嚴自貶夷陵損一角摩挲遺蹟驚開面
吁嗟臥榻豈鼾睡神器瞥眼遭夷芟矧茲片石落兵燹
如委瓦礫誰能監我生愛石等愛玉冥賞與世殊酸鹹

琉璃匣燦壁作友喻麝香沁生貪饑三灾不灾壽終古
磨人星鬢徒影影

蜀鏡詞

鏡徑三寸六分重十兩有半背作寶相花
八盛雙魚海螺之屬銘曰鍊形神治瑩質

良工當脩寫翠對臉傳組如珠出匣似月停空
綺牕綉幌俱涵影中凡三十二字小篆按張君
房麗情集載蜀後主行幸鳳州天雄節度使王
承休妻嚴氏有美色衍愛幸之賜以桃鏡銘云

貪狼風起角聲勁一夜宮粧醉猶靚歌殘月缺百寶灰
拾得當時破銅鏡鏡背猶鐫寶相花龍垂鳳倚爭盤拏
三十二字篆文古曾隨折戟埋黃沙青城山下人如玉
鼓聲震破甘州曲寫翠傳紅能幾時紫珍神死苔紋綠

金精玉英光陸離興亡有鑑誰能窺方頤大口諛貴相
咄哉狎客詞多厄天陰月暗扶天閣颯爽英姿劒芒灼
一從取贈天雄軍美人笑奪羣雄魄吁嗟乎君王愛鏡
鏡蒙塵蟾蜍夜蝕悲青燐化爲三趙村邊土愁照宣華
苑裏人

顏魯公名印歌

營州羯奴輦鼓喧豺虎哮噬降旗旛二十四都無義士
朝廷乃識顏平原平原購謀渙賊勢牽掣羣醜遲南轅
靈武中興數郭李賴此一綫王師存嚴霜烈日有時盡
賊庭窘束遭籠樊常山舌斷睢陽死河北再見長城翻

皇皇名印照千古真卿兩字留乾坤土花剝蝕篆文碧
蛟螭愁結平生魂惟公大節炳日月不與此印爭朝昏
後人重公愈重印等之片玉延崑崙我撫公印重歎息
摩挲猶見兵燹痕秦銅漢瓦不足惜留此正氣排天閭
嗚呼留此正氣排天閭蔡州喫血冤非冤

湯天池鐵畫歌

天池運鐵如運筆鑄就丹青巧難匹蕤賓一躍陰陽通
造化爲爐百怪出荆關已去倪黃陳廬山面目忘其真
匠心乃超筆墨外後無繼者前無人丹竈芒寒騰列缺
灼若洪爐點絳雪百鍊鋼爲繞指柔腕底蛟龍競盤折

山水作障懸堂中嵇康好鍛難爲工烈風雷雨不足避
金氣夜與元冥通咄哉技老人亦老鐵蝕苔衣世誰寶
零星殘稿遺人間一片神工沒荒草天池耽畫畫真奇
我爲天池更進辭何如散盡九州鐵不鑄當無錯鑄時

題石田翁畫虎卷

妙手能寫生不畫梟與獍對此桀驚姿縮手畏彊橫石
田老翁心法奇白日虛堂摹虎癡盤拏據地儼吞噬尺
幅會有風雲隨阿甥耽畫秘手澤重以匏庵爲合璧開
卷颯颯陰風生萬里俛魂動寒魄嗚呼先生畫虎得虎
神鉅牙鈎爪如寫真乙威收盡猛氣馴窮奇亦學騶虞

仁乃知天下本無虎拭目郊原起鳳麟

桂未谷指頭八分書歌

飛龍造書頡創字科斗爲文蟲鳥勢竹挺點漆法象全
筆札何嘗奏精銳未谷妙手真空空以手代筆運轉同
裁斜製方任揮灑十指天矯盤游龍鶴頭虎爪位置巧
運筆何如運指好一波一折神氣完臂挽千鈞墨痕飽
字外出力中藏稜如錐畫沙雖不勝星陳雲布大如斗
酒氣沸沸歎縑繒世人作書苦任筆心手相忘筆乃出
竟捐班管非正宗苦守毛錐計亦失吁嗟乎漢碑漫渙
秦碑穿八分遺法傳誰傳知君投筆有深意濡首還強

長史顛

李老人歌

老人不識何許人偶與雲
叔談其軼事詩以紀之

老人不釋亦不儒半生落拓游江湖
棕鞋布鞵徧城市談元說鬼聽模糊
自言生長荆軻里曾向軍門奪朱紫
數載從征立戰功威聲遠貫單于壘
將軍跋扈計畧疎一朝殃及愁池魚
釋戈解組變名字翩然匿蹟隨樵漁
周妻何肉兩無累偶爾學仙亦遊戲
圯上曾逢黃石公服氣餐霞洞幽邃
會逢不雨炎燿蒙

天子召對明光宮飛符設籙降甘霽
功成拜賜丹砂紅歸來賣藥長安道
有藥無方亦草草釀成仙醴琥珀濃

一飲千人盡壽考我昔遇之城東隅鬚髯如戟神采腴
飲我以酒贈我藥造次未敢嘗醍醐嗚呼老人學仙證
仙籍何不飛空絕行跡側身高拍洪厓肩朝發扶桑暮
碣石不然韜影林壑間妻梅子鶴超人寰胡爲涸跡來
朝市一任緇塵駟素顏

騰禧殿詞

高澹人金鼇退食筆記載明武宗幸宣府得晉王樂伎劉良女居之騰禧殿南

征亦隨侍行在澹人有詩紀其事

騰禧殿前秋草淒鴛瓦蝕盡青琉璃璫樓玉宇溷兵火
壘壘沙礫埋荒基武宗翠華指宣府邂逅晉邸誇名姬
姿首婉麗妙詞令館以別殿名騰禧六宮粉黛不足數

一時蹙盡雙蛾眉羽林南征事天討六龍駕擁朱顏隨
帳中美人競歌舞帳前猛士摧鯨鯢遺簪馳馬備實錄
軼事傳播邊人知武皇不武謚以武廟號無乃含微詞
烟花小部遇天子風流創格真傳奇離宮月黑豹房冷
愁看夾路雙槐垂

玉熙宮詞

筆記又載明神宗時嘗選近侍三百餘人演新樂府陳過錦水嬉之戲愍帝宴

次報汴梁失守遂罷宴後不復幸

太平天子教歌舞三百宮人盡媚嫵止知天子宴神仙
不道筵前動鞀鼓齊聲爭唱玉娥兒翻來樂府盡新詞
座中狎客誰第一紀恩猶說嚴分宜嘈嘈雜劇名過錦

綽約輕旂對對引雅俗全登傀儡場君王何處窺民隱
水嬉之製製更神雕刻木偶投水濱機緘運掣百靈走
出沒邈邈如生人汴梁烽火連天起玉樹新歌聲變徵
極塞風烟暗夕曛故宮花木隨流水珠房月戶蹟全空
瓦礫如灰棘作叢惟有門前舊栽柳依稀猶識玉熙宮

題王蓬心臨北苑瀟湘圖卷

胸中不吞雲夢澤此生莫作瀟湘客筆端不傾萬頃湖
此生莫寫瀟湘圖董元粉本落天地七百餘年等游戲
香光跋後又幾時留作秋帆匣中秘蓬心摹古妙入神
頽毫冷墨乃逼真晚年學畫得畫意退官竟作瀟湘人

瀟湘人老畫亦老解組還同致身早布帆無恙荻蘆荒
風景何如舊時好蓴羹鱸膾引新愁鼓枻還隨帝子遊
寫到洞庭張樂地漁莊鱗舍不勝秋

華嶽廟碑歌

成郎示我華山碑照我鬚眉入太古元精中貫嶽色寒
耿耿光芒射寰宇郭香察書辨者多臆說紛紜互嘲侮
季海復謂中郎書撫拾無憑吾不取古人能書無書名
漢碑傳者誰能數獨於嶽廟叩姓名翻爲前賢笑迂腐
咄哉此碑不合建於延熹年新莽孽燄纏妖蠱歷劫幾
經兵燹餘土花駁蝕溷風雨不合又遭嘉靖末縣令淫

威暴於虎諸碑不毀毀此碑鑿爲砌石臥荒楚遂令妙
跡化作塵珠玉拋同瓦礫伍郭髯趙陌競考據究於金
石有何補至今贗本幾翻刻形似模糊混魚魯欲求遺
跡如辰星況復完好快先覩乃知其物貴真賞會見豐
城劍芒吐鬼神呵護文字全殘石雖埋等糞土嗚呼殘
石雖埋等糞土此碑能傳遇亦苦

英夢禪指墨山水幃歌

天地奇氣無所洩名山大澤撐八垠文人遊戲擬造物
乃爲山澤傳其神吾鄉指墨數高傳衣鉢授受相陶甄
誰其嗣者夢禪子私淑二老標妍新興來解衣墨濡手

逕丈大幅恣染皴指聲墨彩震廊屋怒龍哮虎誰能馴
鈎勒盤折屈金鐵綰結映帶抽經綸遂令天地不傳秘
萬類鼓鑄歸鴻鈞廬山不能遁面目滄海幾欲隨埃塵
胸中粉本自結構蹊徑迴欲超前民須臾滿壁落風雨
千巖萬壑爭嶙峋我生好書等好畫對君揮灑如效顰
真者在前氣已餒腕僵指澁縮不伸安得長廊千楹作
粉壁臥遊五嶽同比隣朝挹洪崖暮碣石章亥夸父空
艱辛與君同領畫中趣認取丹青身外身

魚鷹行

魚鷹似鴨長喙漁人以繩束其喉驅使捕魚探

喉取之蓋終日未得一飽也余有感焉作魚鷹
行以寄意

江南魚美堆市廛魚人網魚如趨羶長竿細罟不快意
魚鷹又遣搜沈淵魚鷹似鷹乏神韻蠢與鷺鴨同比肩
貫以長繩束其頸浮沈結隊隨釣船小魚喁噏觸長喙
饒吻欲飫難下咽提鷹上船搜兩頰探喉抉出登俎筵
依然枵腹驅入水饑腸雷轉空流涎大魚跋浪勢甚猛
眾鷹鼓勇齊羈攀貫腮銜尾出荇藻一嚙未許分餘腴
竟如鵝蚌兩無利阿翁大嚼爭烹煎既不得肉豈快意
羨彼碩腹何便便吁嗟魚鷹計亦左自貪口腹忘其天

終日得魚不得飽縮如鴈大遭拘牽向無長技任驅策
甘隨鷗鷺嬉風烟胡以飲啄自貽害徒爲漁父供肥鮮
嗚呼徒爲漁父供肥鮮魚鴈真可憐

南旺詣宋尙書祠

至元天下半荆棘海運不通河運塞司空奏績永樂間
四百里淤淨如拭延訪不惜採輿論汶上老人獻一得
草草土壩築戴村手挽長河如練直三分下濟徐呂流
七分上合漳衛力百萬軍儲一葦杭從此天難限南北
至今廟貌祠南旺猶與老人共血食停舟再拜緬遺像
二氏子孫守庭闕樸茂初自田間來對客無能述先德

我曾淮上祀平江
蠡蠡豐碑名久勒
今來又過會通河
細訪遺聞更奇特
嗚呼大臣謀國貴
殫忠但計功堪補
社稷立法何分已
與人布衣往往有
卓識尙書智豈老
人下尺短寸長足
羽翼卽今漕政叢
脞多縱理何能逞
胸臆甘苦還須謀
眾丁因革無妨叩
庶臧安得耆英再
起汶泗間更出心
裁畫繩墨虛衷乃
收借箸功尙書老
人兩足式

舟中風雨楚艘大桅爲雷擊斷長歌紀事

黑雲壓天如海立
猝颺掀簸電光急
剗然雲裂銀潢翻
恍惚魚龍破牕入
湖楚一艘銜尾行
窗櫺搖撼聲鏗錡

閔傳雷擊大桅斷光飛列缺篷爲傾桅大數圍高數丈
拉朽摧枯等翻掌神靈咫尺意何如膽落篙師頭盡仰
吾聞神龍有威不妄擊長養功多藉霹靂和風甘雨繼
雷霆妖瘴遁藏避鋒鏑神龍兮神龍何不鼓鬣海外戕
元兇機槍掃盡息狼烽白日魑魅潛影蹤舟車無恙四
方靜歸來雨師風伯萬古叨崇封

諸葛菜詩用杜工部古柏行韵

程材不問松與柏垂世不問金與石物以人重遇亦奇
長短何須計寸尺諸葛菜名傳自誰鬱鬱郊原春可惜
循名如重首陽薇一代山河照清白當年割據蜀山東

瞥眼蓬蒿滿故宮。離離禾黍秋原靜。濯濯岡巒山木空。
是菜不隨兵燹變。一年一度滋春風。芟芟小草不忘報。
如爲丞相標奇功。嗟爾材難中梁棟。混跡荒山世罕重。
適口應輸菜甲香。傾筐誰倩園丁送。甘隨苦李棄道周。
不與桐花飽么鳳。小山叢桂摧作薪。敢倚虛名溷世用。

喬女詞

并序

喬女袁浦人。許字王氏。歲祲謀鬻女。女懷刃往。
欲以死殉。山陽沈子漁隱廉其事。捐金贖歸。王
是舉也。喬之節沈之義。俱有足傳者。作喬女詞
以紀之。

悲風蕭蕭啼夜烏喬家有女泣路隅父兮乃爲媒所愚
鬻妾不問千金軀妾如不嫁父且歿妾嫁何以謝故夫
昭昭大義同羅敷敢愛一死隨狂且懷中七首如湛盧
豺狼魑魅誰敢污幸逢畸士古與徒捐金贖女超泥途
眼中王郎今孰及笑看合浦還遺珠喬女守志志不孤
漁隱高誼世亦無我來採風羨彼姝勝彈古調悲秋胡
孱孱弱息作女模用標篤行傳三吳

遊焦山

吾聞金焦二山焦更奇蟠擎突兀江之湄我來奮屐躡
雲磴直登絕頂窮嶽崎大江澎湃撼山脚海門暮色沈

玻璃布帆渺渺沒雲霧
翩若王母飄雲旗
南隣鐵甕北瓜步
錯出兩岸如布碁
六合形勢入眼底
烟雲變滅無參差
壁間何所有銘刻
瘞鶴蟠蛟螭
堂上何所有剝蝕
古鼎如商彝
摩挲舊物費探討
紛紛考据增狐疑
我生好古不泥古
但取其意忘筌蹄
歸去僧寮日已夕
梅花恰開當牕枝
對花一笑心眼豁
背客先補焦山詩

小石梁歌爲仁和李生賦

生名方湛寶一石多奇峭
攜以自隨名之小石梁
其自號也作長歌賦之

一帆遠掛吳江水
收取金焦入袖裏
歸來又見小石梁

雁宕天台合有此
李生好奇遇亦奇
愛石如有山水痴
千里懷人袖石往
雲根突兀光陸離
見我正當人日雪
研北繽紛粲玉屑
入門先讀草堂詩
句不驚人慙叫絕
贈我一編書同岑
浙東名士真如林
撫軍嗜古紹衣鉢
死矣繡出傳金針
生出及門阮撫軍伯元門下
李生詩乃寓於石色
奪仇池九華碧取徑全師白也
狂輦石真成阿章癖
我愛君石重摩挲咄哉名輩多
坎坷石入君手辭岩阿
君才如石誰搜羅
語君愛石莫輕獻
物色端須有卞和

天妃牖歌

天妃開下水壁立
天妃開上人如織
千人挽拽萬人呼

一時費盡移山力紅旗高掣鳴銅鉦手挽天河欲倒行
進未百步退五十長纜怒與狂瀾爭呼起馮夷爲擊鼓
夾岸喧如老蛟舞一片人聲雜水聲赤燄燠天汗如雨
一船才過一船來六鰲爭擁雲濤堆丁男武弁合努力
落日已落遙山隈喜見長河月如埽好趁南風渡河早
泊岸愁逢大吏嗔揚帆不顧舟師惱我對舟師欲寡歡
舟師挽運真艱難大官坐飽太倉粟誰到天妃閣下看
寄焦山借庵和尚用東坡寄澄慧大師韻

天風吹作江南客飽看江光與山色金山穠麗焦山清
突兀江心門奇骨湧漫雲樹氣鬱蒸坡坨小嶺盤魚鷹

看山不盡就山宿襖被僧寺圍僧燈人生奇境幾回至
走馬看山笑我似瀕行重拭瘞鶴銘留得胸中幾行字

焦山紀遊用東坡遊徑山詩韵

大江天塹限南北奇氣突兀留山川人生壯遊不到此
空與浮世相周旋江流南去入滄海日月騰蹕沈虞淵
齊烟九點混碧落側身直上焦山顛焦山絕頂擁蘭若
峯巒攢簇環青蓮對岸北固劃半臂縈青繞白形蜿蜒
焦先仙去剩仙跡空留丹室棲枯禪借庵上人富文翰
沙門萬選推青錢我來名山宿名利僧條抵足成安眠
詩禪活潑悟上乘真如妙諦叅魚鳶更淪新茗沃腸胃

惠泉水冽活火煎我生舟車日勞攘屈指幾日能安便
禪牀一夜證蕉鹿俯仰身世真茫然明朝大笑挂帆去
不與山水爭長年

梅庵詩鈔

長白鐵保梅庵著

五言律

山行二首

長劒倚秋風蕭蕭塞馬雄曠懷低落日詩思壯飛蓬
磴确故山遠崎嶇猿路通天涯同逆旅何處問途窮
遂入深山裏盤紆鳥道紛缺崖橫古霧頽壁走荒雲別
澗猿啼客前溪鹿嘯羣行行認村火快馬趁斜曛

重九後一日宿龍泉菴二首

已負重陽約茲遊興更超溪山千里濶城市一身遙曲

梅庵詩鈔

卷三

一

逕勞相問緇林快見招夜闌僧閣靜泉響徹虛窻
頓覺塵根淨泠泠客思閒況當巖際月流影松蘿間僧
定魚窺沼人稀鹿扣關壯遊懷永夜相對解朱顏

晨起

晨起披雲竄窮幽闢莽榛宦情閒似鶴山面冷於人漱
澗通泉脈攀蘿動石鱗會當凌絕頂高處步清塵

枯坐

枯坐遺塵想幽棲愜性真乍聞知夢穩入靜覺香親天
近涼生席牕虛月趁人孤吟成別調清響逼高旻

題傅頭陀雲指畫

道人本遊戲潦倒王公前已證無生訣能通一指禪
愁心託粉壁酒氣潑蠻牋老作頭陀去狂名日下傳

有懷亡友益亭宮允

中允聲名大殘詩掩淚看身應窮到骨心更冷於官
舊雨如星散新交絕古歡魂歸楓樹黑缺月壓窗寒

西郊晚眺

薄暮西郊望遙天接翠微灘聲留雨住雲影帶山飛
野濶秋容淡霜寒落葉肥隔溪樵路暗人背夕陽歸

破寺

暖屋屯風雨陰房透日星近村僧亦俗破寺鬼無靈
碑

斷前朝字門留此日銘傷心舊檀越誰問佛燈青

西山道中

犖确西郊路涼生雨後天馬銜當路草人漱出山泉遠
樹平於岸秋巒澹入烟一官清俸足祇少買山錢

讀鄉前輩遺詩感賦十二首

額學士麟閣

北海留遺籍文章闢草萊功名馬上得聲教日邊開朝
野瞻新治台衡起異才書生號麟閣詞賦鄙鄒枚

馬處士大益

一片雷溪月清輝映草堂長留居士影不改布衣裝五

字傳衣鉢餘生託老莊波濤春易水巨響撼雷硠

賽中書九如

破屋老風雨傷哉阮步兵萬言真倚馬五字竟長城家
計文章誤功名老病輕茂陵遺稿盡金石久無聲

李處士鐵君

落日田盤暮乾坤老布衣詩成蚊睫古魂返鴈峯非入
市嫌泥滑依山愛蘼肥水雲真不玷詞客似君時

卓農部悞葺

俎豆文章業流傳仗後人百年扶大雅九地戴功臣欲
廣匣中秘旁搜席上珍吾生真好事夫子豈前身

兆處士牧牛

何處牧牛子窮愁迸斷腸夕陽一聲笛天地久低昂性
證寒山淨詩宗賈島狂冰花結成字展卷夢魂涼

福將軍松厓

將軍返天上旗鼓靜騷壇人並金臺古詩成易水寒老
懷看故劍白髮愛儒冠弱冠增聲價龍門舊識韓

觀補亭夫子

海內瞻山斗嗟余忝及門憐才真破格知己不言恩舊
夢傳心訣遺書見指痕瓣香垂不朽千載溯淵源

英相國夢堂

竹井老人老古音誰復彈怒龍喚雨驟奇鬼搏人寒墨
氣凝烟紫詩痕帶血乾苦吟成別調風雅振台端

善員外眉濱

元暉堪繼美持此謝眉濱誼在稱猶子詩成作古人高
歌燕市月同賦潞河春往事風流息低吟獨愴神

劉冠軍虛白

老驥耻伏櫪悲鳴性不馴青年推將種白首作詩人幽
興窮山水奇蹤託鬼神此生真夢幻鴻爪委緇塵

恒宮允益亭

昔共論詩日秋難見古人至今歌薤露誰復繼陽春雅

望生前少交情死後真錦囊遺好句不負苦吟身

廢寺

廢寺何年建殘碑偃道旁古牆屯蝎母敗壘據蜂王樹
老心先燼僧寒面有霜不堪問香火金碧舊輝煌

密雲道中

秣馬檀州道嚴裝趁晚風人行亂山外日落大荒中較
獵秋原濶防邊古堞雄壯懷看故劍歸去事猿公
勝國籌邊計燕雲久駐兵羽書飛絕塞獵騎薄神京中
外分疆域英雄此戰爭時平刁斗息驛路可宵行

晚宿姚家莊

晚就田家宿荒村路不歧炊烟穿白屋落葉下疎籬雞
黍供嘉客蓬茅館舊知不須繩禮數婦子共嘻嘻
徙倚柴關靜蒼茫夕影屯野禽飢啄隴秋樹瘦闌村犬
熟當牕臥人閒負日蹲安居遠塵市應笑客停軒

較射再示諸同人

我有肅愼矢傳家定鼎初乾坤經戰伐中外混車書作
尉叨

恩蔭爲官傍直廬

彤廷重較射猿臂合先舒

忽動爲儒恥雕弓出錦段心情消白戰臂力健烏號二

笑謝柔翰千金市寶刀天山三箭定休射浙江濤

早赴西園

寒柝驚殘夢春燈墮翠蟲棲禽酣抱樹落月冷搖風石
路車聲澁村廬炊火紅

西園急封事曉色破鴻蒙

題鄭秋浦侍御小照

披圖懷舊雨迢遞隔烟霞之子理歸棹滿園飛落花交
情半鷗鷺生計足桑麻白板青蓮屋孤吟滯歲華

結交燕市北蹤跡數年疎遠夢形猶隔高懷畫不如小
閒聊學圃比歲漫懸車好返蓴鱸思金門待上書

懷甘道淵

百粵瘴烟地君行此獨過黑風吹草木白日關龍鼉千
里客程遠一肩行李多微官等匏繫投老躡風波
白髮詩人老黃雲客路長孤身投五嶺歸雁絕三湘託
命波濤裏全生瘴癘鄉壯懷真不淺七十到蠻荒

次韻答時帆學士寓居灤陽僧舍

性僻依蘭若高吟萬籟空官閒僧舍外詩冷宦途中排
闥山雲變掀窗塞日紅清心通梵唄吾道任西東
獨抱冰銜久同來逆旅中徑荒疑拒客馬病怯嘶風老
屋枯燈暗危牆穴鼠空夜深懷舊雨山月照迷濛

幽棲

落木澹秋夕幽棲白屋冥寒葩橫短砌闕雀墮疎櫺室
小書爭席心閒筆効靈詩禪叅一指兀坐合忘形

小閒

小閒依白屋秋色老堦墀蜂冷低穿牖花殘臥出籬耽
書成獨賞得句欲居奇木葉蕭蕭落何人正下帷

灤陽客中作

時

母太夫人病

歲歲灤河役茲遊多苦吟一官弛色養獨客減名心望
遠愁魚雁閒居媿影衾那看青鏡裏白髮逼華簪
藥裏新調後茫茫出塞河親顏違有日子職效無多誰

解倚閭望徒增陟屺歌何來醫國手大藥起沈疴
旅館真蕭瑟終朝睡眠矇高懷因客減新夢與愁通渺
渺趨庭想蕭蕭出塞風白雲瞻望極迢遞悵飛蓬

次時帆學士韻

灤陽樓舊館風景未全殊雲海屯陰密詩天抱影孤街
坳干澗落樹遠一蟬無忽憶巴山夜關河夢與俱
我有高堂病偏當行役時家書疑塞雁歸夢卜靈蓍藝
圃期頻謝歡場到每遲思親復懷友苦語釀真詩
載赴南交役來賓驛路長情真

天亦動

恩重願能償

余以母病入告藉送安南使臣入京歸省

快觀親顏霽忻調藥

裏香衰遲得頤養覆載識難忘

古北口令公祠

祀宋楊業

將軍本無敵遺廟枕雄關地險山河壯時平朔漠閒神
猶棲鎖鑰身未唱刀環歎息孤忠盡蕭蕭兩髻斑

宿田家

邂逅出家宿荒畦路欲迷豆棚當戶亞瓜架與簷齊點
鼠窺巖壁饑禽啄廢犁山村更漏斷屋角聽鳴雞
婦子當門坐驚呼顯者來土牆懸虎韞石碓繫龍媒官
樣添茶竈行裝剩酒杯蓬門容託足新夢入蒿萊

春雪

素衾沉古夢窗外已堆銀春雪不成絮薄寒先中人爐
烟消楫桡簾影息埃塵謝女才難繼呼兒一效顰

時課女讀

王子上已郭外感賦

老淚無端下思親上已前愁深修禊日春冷賣餠天改
火成新序承歡是去年半生風木恨遙結墓門烟
北郭經行處蒼茫日色暝城烏春叫雨原樹夜棲靈渺
渺山雲變萋萋墓草青誰家殘最屬蝕盡舊題銘

涿州道中風雨

涿鹿抗雄鎮蒼茫古戍秋山川變督亢風雨戰蚩尤鴻

雁北來急桑麻南去稠停車問遺俗懷舊獨淹留

發新城

明發新城色衝雲路宵漫禾疎猶望雨民黠不驚官古
驛炊烟冷荒塍蔓草乾自慚乘傳客行路不知難

懷弟聞峯

君歸遼海曲我向大江邊歧路人千里聯床夢隔年關
河騰塞馬風雨上吳船忽憶趨庭日登高淚灑然

道中感懷

往日歌行役慈親悶倚閭今來承使節猶似望回車墓
草連雲暗征衫掩淚舒夜臺應悵望何以慰離居

宿花莊

晚就花莊宿花莊花已淒田車欹短壁水特臥荒畦日
夕桔槔靜秋深穠稔齊孤吟村消息土屋坐然藜

臨淮關望淮水作

萬里長淮水奔流肘腋間星離平楚近帆到大江還佑
客船爲市津門浪作關臨河據高閣清夢出烟寰

余亦耽微尙高吟濯足圖

余嘗寫濯足萬里圖照

自慚泉石癖合

寄水雲區風雨江鄉濶山川霸業孤憑欄弔公路秋草
故城蕪

滁州道中

八言金 卷三
巖壑環滁郡肩輿入翠屏烟蘿沈大野玉笋插蒼冥晚
稻沿溪熟秋雲帶雨青高風懷六一渺矣醉翁亭

贈攝山張處士玉川

我愛玉川子結廬蒼翠邊病添酬畫累老費買山錢梅
鶴聯新譜烟霞謝俗緣長安交舊盡別淚佛燈前

登報恩寺塔

拾級浮圖上雲中響法鈴地涵三楚白天擁四時青城
郭沉虛籟江山入窈冥欲叅無上諦高舉學忘形

雄縣舟中

一片桑麻地淤成雲水鄉野田連岸白官樹比人長船

小輕於葉河流曲似腸舟車同利涉

王道總康莊

冬日小集贈元圃中書

小坐蕭齋寂閒談協古歡夜深添宿火客熟減盤餐薄俸成儒業清詩笑禮官廿年交舊盡青眼對人難

元圃移居喜贈

半畝棲身地翩然賦卜居乍經新戶牖還憶舊門閭座有居停客家無擔石儲高堂重頤養心喜問安餘

贈鐵夫

君才非百里翻合廣文窮性僻官宜冷緣慳氣益雄半

生成潦倒萬類入牢籠好樹千秋業文章奪化工

獨坐

獨坐耽幽趣蕭蕭四壁空窗明燈影外雪盡雨聲中
籟息早息靜更深梧栢紅孤吟成別調清興幾人同

詠諸葛菜

一掬行軍菜移根鎖院深花猶懷葛亮人孰繼韓擒得
飽同清味含酸識苦心膳瓶無別種留伴短長吟

眼倦

眼倦拋書卷繩牀自曲肱室虛通暗鼠窗穴透饑蠅
宦況閒於鶴詩禪冷似僧明朝新雨過郊外興堪乘

易州

千古悲歌地茫茫易水東一從埋壯士無復起秋風地
遠搜奇駿天高貫白虹重遊感今昔辛苦注魚蟲

重經易州鎮署感懷四首

并序

余幼隨先大夫官於易寓署中攻舉子業三
年成進士觀政吏部嗣先大夫捐館舍扶柩
去易於今三十年矣丁巳六月以禮侍督

萬年吉地工得遊舊署感故思親百端交集勉成四律
歌以當哭云爾

每憶趨庭日音容愴素懷那堪風木恨重覩舊衙齋久

矣微音隔依然畫戟排口碑滿道路顧我話同儕
卅載童遊地重來感百端乍更新館舍猶列舊材官山
水緣難盡風雲興已闌拂街花濺淚不獨雨聲酸
老屋庭陰合聯牀此下帷每當舊遊處益愛少年時窗
外綠楊古階前紅杏萎不堪問搖落相對捋吟髭
白髮老兵在含悲認故吾猶存公子號不改秀才呼奕
世歡如昨當年惠尙孖旁觀誰解此行路爲嗟吁

哭弟閔峯少宰四首

忽抱鵠原慟天倫樂事休腸枯猶貯淚心死不知愁我
尙依金馬君先駕玉蚪壯懷何所託餘恨結松楸

報國竟何事倏然返玉京鬼神爭福命天地忌功名官
已登三事書空擁百城無由問榮落端起不平鳴

莫憶聯牀日空餘對雨圖弟兄雙淚絕天壤一身孤遺
稿傳心語殘書半手摹不堪搜篋笥病眼久模糊

宦跡如形影浮名比二難死生真共被存歿復同官臺
閣增離緒謳吟失古歡卅年快心事迴首足悲酸

姜女廟見弟閩峯題名感賦

大節凜天地誰能辨有無令名騰野史遺廟枕荒隅恨
已成精衛心難告董狐滄桑無限劫望眼未全枯

少宰題名舊摩挲兩淚彈事關名節重情到死生難

古詩空紀懷人興
易闕宦遊增苦趣
腸斷駐征鞍

過松山杏山作

苦戰興王日
松山復杏山
一軍成大捷
萬騎返重關
地遠桑麻厚
秋空壁壘閒
坡陀存故址
懷古陣雲閒

題英夢禪小照

天末裁詩日
披圖喜見公
面龐增矍鑠
心事託虛沖
不問今來去
都忘老病窮
故交零落盡
有夢到關東

興京道中

走馬興京路
征衣帶雪寒
層陰排大麓
積石響奔湍
近水茅爲屋
依巖木作欄
淳龐延舊俗
如見古衣冠

汪清邊門道中

蠶叢蹊路僻迢遞接邊門樹密嵐陰濕岩深虎氣昏野
田和雪種荒草帶冰屯自顧良遊壯高吟到塞垣

山行

崎嶇山逕險辛苦此邁征遠樹高無幹冰河脆有聲長
途知馬健短後覺衣輕爲憶蜀山惡褒斜尙未平

渡黃河

清黃交滙處濁浪混雲區天地分涇渭山川界楚吳源
分星宿遠派結尾閭紆督漕臨重險安瀾慶轉輸

舟中

篷背雨初霽葛衣生晚涼
開窗納遠岫移岸就斜陽
水近魚充饌官清客減裝
勞勞計飛挽臥聽棹歌長

舟中不寐

勞人無短夢不寐擘吟牋
原野窗中見星河枕上懸
心隨南雁去身與白鷗眠
又識舟居苦歸期九月邊

題黃心盒所選今詩所見集

赫矣名山業搜羅仗散人
鬼神爭顯晦天地慣沈淪
斯道流傳苦吾徒月旦真
一編垂不朽大雅此扶輪
山人秘微尚性僻獨耽詩
作客悲王粲逢人說項斯
律嚴真鑑在心苦故交知
欲殿時賢後孤吟信復疑

鄭口曉發

寒戀重衾睡揚帆入渺溟曉篷掛殘月極浦聚繁星岸
柳披霜臥河魚帶雨腥經年何所補蹤跡類飄萍

淮安古蹟八首

漂母祠

王孫哀一餓真賞出風塵身未依亭長恩先藉婦人奇
才凌楚漢高義薄君臣莫問千金報叢祠廟食新

枚臯宅

枚臯遺舊址白屋老荒榛環堵謳吟地文章侍從臣江
淮悲去客班馬繼前塵寂寞揚雄宅誰爲問字人

袁江浦

赫矣袁公路爭標不世勲壯懷低落日兵氣散江雲欲
拔曹劉幟空輸淮海軍蒼葭橫極浦敗壘駐斜曛

劉伶臺

畸人不可見落日古臺荒天地容高隱山川入醉鄉一
灣淮水碧十里菜花香會有獨醒者攜樽問酒狂

杜康橋

天上酒星落酒人誰見招我來枚叔里一問杜康橋畫
舫遊來晚青帘望處遙會逢題柱客名向醉鄉標

娑羅碑

北海存遺跡荒碑字已磨
翻來真搨少缺處却灰多
古法人難似殘書辨易訛
雲摩藏舊本心賞重摩挲

枸杞井

仙人去不返枯井自生澗
冷日淒靈草秋風沒石欄
名同神漢古味與醴泉乾
莫問東垣術朱顏欲駐難

萬柳亭

春風吹落絮萬柳散如烟
人事隨雲水孤亭渺歲年
夕陽明雉堞頽岸挂魚船
欲補湖山勝栽培豈偶然
萬柳
存者余屬寺僧
補栽以識勝槩
無一

春草

一夜梅梢雨連天漲綠莎映階芳信早
露屐燒痕多春色去如許美人愁奈何
故園渺天末離緒上烟蘿
屋角翻新綠菁蔥破曉繁陽春真有脚
宿雨尙留痕原野添生意天涯感舊恩
池塘減吟興不爲憶王孫

微雨

微雨漸成絮蕭蕭增夜寒燈殘人語息
坐久客衣單有夢通蕉葉無心競鼠肝
郊原生意足明日上樓看

破寺

破寺何年建荒涼四壁存驚沙埋野徑
冷日抱頽垣夜黑鷗爭樹人稀虎到門
更無僧駐錫燈火息朝昏

廢塚

落日照枯塚淒風上古原有時通鼠雀何處問兒孫骨
久埋荒草人誰感舊恩茫茫北邙地爭得一坏存

壞橋

昔日平橋臥春波映彩虹久疎題柱客愁絕渡河公岸
遠梁初斷潮回孔尙通艤舟懷利涉渺渺濟川功

斷碑

鼃屬當堦斷殘碑沒草荆宇多經土蝕僧不記雷轟金
石豈終古乾坤真忌名何能三日臥書法矢專精

敗壘

莽莽戰場古平原壘尙新沙荒埋折戟月黑閃愁燐封
埃烟初息鴻溝界不真八公餘草木猿鶴避驚塵

崩崖

礫确危峯墮攀蘿慘客魂石傾妨鳥道苔長沒雲根絕
壑風烟古陰厓虎豹屯何人斷鰲足斧鑿尙留痕

缺岸

天末怒龍起長河入海潮岸沙淤作坎堤柳臥成橋激
溜吞舟滑荒村駕浪遙中流誰保障河朔息征徭

廢宅

誰問枚臯宅春歸瓦礫叢臺空狐嘯月階冷草呼風兵

幾千楹外滄桑一瞬中看人起高第樓閣跨穹窿

空城

巖城高百雉瞥眼成樓荒老馬識前軌饑烏認女牆近
郊餘敗壘出郭剩殘陽更抱池魚慟當年此戰場

枯井

九仞靈原塞觀空欲坐忘地移泉脉改水盡石田荒豈
有虹堪飲空餘蛙可藏不知灌園叟何處挹寒漿

卽席呈惕庵同年

不飲耽狂藥風塵愴客魂劇談雙耳熱苦語一燈昏民
有攀轅慟天開解網恩宦場容倔強得失總休論

輓恒餘堂觀察四首

湖楚稱兵日勞勞感歲華角聲驚草木杯影變龍蛇誰
覓三年艾難回八月槎臨清關外水哀雁咽平沙
夙倚郎官重分符志已非不知游宦樂徒作旅魂歸地
遠書難寄囊空硯亦稀箕裘欣有託家學紹前徽
未改耽吟僻船窗競唱酬病成詩轉劇交到死難休竟
作無家別誰聞片語留機槍猶未掃遺恨寄吳鉤
桑梓編初就才人賴不磨殘詩行篋貴遺稿茂陵多死
作軍儲計名登文學科好傳不朽業交誼重山河

秋夕

涼宵耽孤寐露坐酒盈樽天近雲低樹秋疎月到門瘦
蛩遲短夢寒杵亂吟魂天末涼飈起蕭騷萬竅喧

書家牧牛子詩集後二首

公名兆勳正紅旗人

落拓牧牛子孤吟任別裁途窮空有舌詩冷欲無胎昂
首天應泣嘔心鬼亦猜何人鑄賈島標此谿天才
幾卷驚人草光芒動日星士窮詩任過才大地分靈偃
蹇垂花甲飄零剩白丁吉光留片羽千載眼誰青

和元陸天錫齋中十咏

焦桐

爨下成眞賞中郎契最深煮應聞鶴唳焚豈變龍吟莫

解南風愠難灰太古心那堪燒尾後更欲託知音

蠹簡

珍重雲溪簡晶光下蔡倫自經藏脉望久矣謝龍賓價
失長安貴名輸子邑新蟲書復鳥跡掩映足精神

破硯

潛璞誰爭賞良工妙取材亦知礪易缺不信石成災有
客割雲去無人完璧回獨留雙雀眼眇眇向誰開

殘畫

蕭齋半壁畫剝落雪霜侵每到臥遊處不禁春恨深缺
崖迷古霧遠水斷遙岑什襲前朝蹟丹青不可尋

敗裘

三十年來儉章身戀敗裘袖穿驚歲月衲補識春秋莫
問千金價還堪百結收五陵人不賤未敢贈同仇

舊劍

春坊字未滅三尺雪光橫閱盡古今事每當風雨鳴幾
年愁鬼母千里走長鯨掛向蕭齋壁何人有不平

塵鏡

面目憑誰識風流我自憐壯懷千載上秋水一泓懸對
鏡鬚眉在觀空形影遷模糊塵未拭小照怯人傳

廢檠

孤檠有代謝棄置竟誰憐已照聖賢後不堪兒女前秋
深悲棄扇魚盡笑忘筌莫羨金蓮燭殘膏對舊編

斷碑

何年遺斷碣呵護幾經秋不共銅駝沒還隨石鼓留姓
名有鐵券文采動銀鈎歷劫驚雷火鍾王不可求

臥鐘

荊棘秋風晚豐鐘蝕土花銘留唐歲月隸古漢龍蛇未
醉山僧夢空聞暮鼓搥何人識姑洗廟拭脫泥沙

續齋中十咏

陋室

吾廬吾亦愛歲月任消磨聊以蔽風雨安能廢嘯歌壁
懸蚪蚪古窗落畫圖多一枕北窗下真成安樂窩

癡童

五尺應門子天真爛漫中頑應輸鄭婢黠欲擬巴童秋
葉酣長夢花時怨落紅不須施夏楚老子本癡聾

破筍

破簾已經年埋塵欹案邊無衣防鼠嚙有帙笑蟲穿客
覓懷人草童窺買酒錢亦知無長物留取伴青氊

廢稿

幾幅殘詩稿吟囊手自開頓驚佳日去如見故人來天

地餘糟粕詩書尙劫灰不須焚欲盡留覆酒家醅

敝帚

豈有千金享何當拾作薪不堪供灑掃猶自戀灰塵
糝徑應迷客飛花欲笑人糞除齋事早落葉聚成茵

缺案

早歲依函丈今猶傍几筵不隨書共蠹應與硯同穿
舉椀塵侵座揮毫酒漉箋媿非香案吏長作掌書仙

退筆

頓訝中書老投閒未得閒不須埋作塚久矣積如山
江令花初謝毛生鬢已斑何人誇脫穎博得錦衣還

舊墨

匣裏險麋古珍藏拱壁同品高于載上人老一丸中盈
斗誰能飲塗鴉媿未工豹囊重什襲莫漫費雕蟲

漏卮

卮漏憑誰補殘杯飲腐儒盃猶堆琥珀盤欲走珍珠我
已沾餘瀝人應笑不觚醉來書卷上留得酒痕無

殘帖

帖古龍蛇暗碑殘半失名定應驚石破不敢怨雷轟呵
護餘神在臨摹逸態生賞心聊獨玩未許換連城

廣齋中十咏

研山

洞天真一品茲物最超羣
綠漲端溪雨青連剡水雲
仇池撐突兀西穴結氤氲
不作三灾石松煤鎮日薰

藥籠

幸少休文病寧誇仲景奇
劇當春雨後合向夜深時
是藥堪醫俗無方可救癡
丹成問九轉苦口欲貽誰

茶竈

茗戰知誰勝茶經秘未窮
歌成七椀後香展一旂中
蟬眼珠初瀉松濤響暗通
何當禪榻畔聽取落花風

談麈

晉代誇談塵風流此尙傳捉來資話柄豎處認詩禪夜
雨聯床後孤燈趺坐邊欲持如意舞對此一茫然

蕉扇

莫羨齊紈巧裁成玉有紋欲揮白屋暑拚取綠天雲皎
若鸞章結翩如鳳尾分何須怨搖落披拂正情殷

藤簟

八尺文茵滑琉璃映薄膚不同敷忍草敢信伏青蒲臥
引書千卷涼生室一隅銀牀無夢到詩汗浹龍鬚

唾壺

涎垂萬卷書口燥氣難舒未忍敲壺缺誰能拾唾餘詩

腸嘔欲出吳語習難除莫漫霏珠屑蕭蕭腹笥虛

竹杖

少陵桃竹杖落手幾流連對此難稱老逢人怕問年望
雲支瘦影待月倚吟肩署作遊山侶新銘手自鐫

紙帳

一枕羅浮夢梅花紙帳間戛鉤風動竹捲幔月移山花
鳥題應遍笙歌教未嫺不知吟榻上塵慮幾時刪

山屐

不盡梯雲想年來屐欲穿未窮天外步直擬地行仙影
落煙霞外蹤留猿鶴先著來堪濟勝高咏翠微巔